

বুড়িচংয়ে ১১ সরকারি প্রাথমিক বিদ্যালয়ে প্রধান শিক্ষক নেই

সাইয়িদ মাহমুদ পারভেজ, কুমিল্লা •
কুমিল্লার বুড়িচং উপজেলার ১১টি সরকারি প্রাথমিক বিদ্যালয়ে দীর্ঘদিন ধরে প্রধান শিক্ষকের পদ শূন্য রয়েছে। ফলে বিদ্যালয়গুলো পরিচালনাসহ শিশুদের পাঠদান বিঘ্নিত হচ্ছে। এসব শূন্যপদ পূরণের জন্য চিঠি দেওয়া হলেও উর্ধ্বতন কর্তৃপক্ষ কোনো ব্যবস্থা নিচ্ছে না বলে অভিভাবকদের দাবি।
অভিভাবকরা জানান, উপজেলার ১১টি সরকারি প্রাথমিক বিদ্যালয়ে প্রধান শিক্ষক না থাকায় ওই স্কুলগুলোর শিক্ষার কার্যক্রম যথাযথভাবে পরিচালনা করা সম্ভব হচ্ছে না। বিভিন্ন অফিসিয়াল কাজ-কর্মের জন্য সহকারী শিক্ষকদের উপজেলা শিক্ষা অফিসে আসতে হয়। এতে শ্রেণির পাঠদান ও অন্যান্য কার্যক্রম সঠিকভাবে পালন করা সম্ভব হয় না।
উপজেলা শিক্ষা অফিস সূত্রে জানা যায়, এ বিদ্যালয়গুলোর মধ্যে রয়েছে বুড়িচং উপজেলার পীরঘাটাপুর ইউনিয়নের উত্তর শ্যামপুর সরকারি প্রাথমিক বিদ্যালয়, দক্ষিণ শ্যামপুর সরকারি প্রাথমিক বিদ্যালয়, পীরঘাটাপুর সরকারি প্রাথমিক বিদ্যালয়, বাহেরচর সরকারি প্রাথমিক বিদ্যালয়, ষোলনল ইউনিয়নের মিথিলাপুর সরকারি প্রাথমিক বিদ্যালয়, বাকশীমুল ইউনিয়নের আনন্দপুর সরকারি প্রাথমিক বিদ্যালয়, সদর ইউনিয়নের উত্তর জগতপুর সরকারি প্রাথমিক বিদ্যালয়, ময়নামতি ইউনিয়নের হরিণধরা সরকারি প্রাথমিক বিদ্যালয়, রাজাপুর ইউনিয়নের লড়িবাগ সরকারি প্রাথমিক বিদ্যালয়, চড়ানল সরকারি প্রাথমিক বিদ্যালয়।
এ ব্যাপারে বুড়িচং উপজেলা শিক্ষা কর্মকর্তা মো. সেলিম মুন্সী জানান, প্রধান শিক্ষক পদে পদোন্নতির জন্য সিনিয়রিটির ভিত্তিতে সহকারী শিক্ষকদের তালিকা, পাঁচ বছরের এসআরসহ প্রয়োজনীয় কাগজপত্র উর্ধ্বতন কর্তৃপক্ষের কাছে পাঠানো হয়েছে।